




*Sabtu, 04 Maret 2023*

**Ogen: Hosea 9:10-14**



**Ciga Ate Dibata**



**C**iga ate e sada perasan si la sedap, la entabeh ras mutah ate natpsa. Ciga ate e biasana adi ngidah benda si enggo macik, aromana la sedap, erbau ras berngan. Bagi bangke menci enggo piga-piga wari i balik lemari, enggo teranggeh bauna i bas kerina ruang-ruang rumah. Biasana lanai bo sitimai wari pagi, uga kal pe sidarami i ja ingaan bangke e. Di kune enggo jumpa, mis kal nge si agui, si angkat ras siambekken ndauh i bas rumahta nari, entah si tanemken gelah ulanai teranggeh bauna. Bekas bangke e pe lanai ateta bage, mis nge si bersihkan alu pembersih lantai seh lanai teranggeh sitik pe bau bangke e. La kal entabeh nganggehsa si mbau-mbau.

Perbahanen bangsa Israel ciga kal ate Tuhan, mbau dingin mutah atena natapsa. Bangsa Israel kenca eh i deleng Peor minter nambah man baal-baal, ciga ate Tuhan natapsa bali ras cigana ate Tuhan man baal-baal e. Adi benda ciga ate uga kal pe si pedauh i bas kita anri, bage me Tuhan mpedauh bangsa Israel e i bas adep-adepenNa nari erkiteken ciga atena lagu langkah kalak e.

Ban cigana ate Tuhan, kiniulin-kiniulin bangsa e lesap bas ia nari, lanai lit pagi anak ipupusna, lanai lit diberu si mehuli kulana, lanai lit anak i bas bertin. Sada pe lait ipediaat dibata nggeluh. Enda ngatakensa, lanai lit massa depan mana bangsa e, la lit ahli waris si nerusken keturunan ras kegeluhen. I masapken Dibata bangsa e, lanai atena sitik pe iidahNa, seh ku sinursurna pe kerina. Anak-anak si enggo tubuh pe la ipediatna mbelin. Kerina ilesaapkenna. Adi Dibata enggo erciga ate, lanai bo lit si mehulina, kernep nari bagi anak kuta Sodom ras Gomora, radas sada kuta, radas sada generasi.

Mari si pekena lagu langkah, perkatan ras perbahanen terlebih kesetia erkiniteken man Tuhan. Dibata bapanta e percimberu, adi enggo angkatna jadi anakNa, lalap atena kita sekerajangenna.